



**Tužilaštvo Bosne i Hercegovine** Krađa novca iz Centralne banke

## Pod istragom 32 službenika

**SARAJEVO - Tužilaštvo BiH proširilo je istragu o krađi 600.000 maraka iz Centralne banke BiH na još 32 službenika te finansijske institucije!**

Ismet Šuškić, tužilac Tužilaštva BiH, potvrdio je da su navedeni službenici osumnjičeni za nesavjestan rad u službi, i da je SIPA protiv njih nedavno podnijela izvještaj. On je dodao da je do sada ispitano 19 osumnjičenih službenika, dok će ostali biti ispitani u narednom periodu.

Šuškić je zatražio od Suda BiH da se za još tri mjeseca produži pritvor Nedžad Bajraktareviću (40), službeniku CB BiH, koji je uhapšen u decembru prošle godine, zbog sumnje da je ukrao 600.000 maraka iz te institucije. Kao razlog za produženje pritvora, Šuškić je naveo bojaznost da bi Bajraktarević, ukoliko se nađe na slobodi, mogao utica-



**SLUŽBENIK UKRAO 600.000 MARAKA** Centralna banka BiH

ti na svjedoke, koji još nisu ispitani. On je rekao da tužilaštvo raspolaže informacijama da je Bajraktarević dio ukradenog novca sakrio, a ostatak potrošio. Šuškić kaže da je prema istrazi, koju je sprovela Obavještajno-bezbjedonosna agencija BiH, Bajraktarević ukradeni novac trošio na njemu blisku osobu, koja će takođe biti ispitana, a čiji identitet nije želio da otkrije. On je najavio da će istraga u ovom predmetu biti završena za mjesec dana, nakon čega

će biti poznata konačna tužilačka odluka.

Podsjećamo, Bajraktarević, koji je bio zaposlen na mjestu referenta za gotovinske transakcije u Odjeljenju za trezorske poslove CB u Sarajevu, osumnjičen je da je u periodu od 2012. do 2014. godine u tri navrata uzimao novac iz trezora. Iz trezora je uzimao novčanice u apoenima od po 200 KM, odnijevši tako 600.000 maraka. On je nakon hapšenja priznao krađu novca i rekao da ga je potrošio. **Sn. K.**